

學蔭軒集

莆田江春霖
題簽

丁巳孟夏

學蔭軒集

君彥敬題



學蔭軒集卷五

番禺王國瑞撰

序記箴銘

戴忻然封翁暨德配陳夫人六十雙壽序

古之享大年膺厚福者必由積德施仁所致其來有自論語曰仁者壽中庸曰故大德者必得其壽孔聖之言彰彰矣又稽諸詩書南山之章曰遐不作壽德音是茂蓼蕭之章曰其德不爽壽考不忘又曰令德壽豈洪範之篇曰九五福一曰壽又曰攸好德若是乎言壽者必推本乎仁造端乎德乃克壽享彭喬歸然爲天下全福之人也戊申八月某日爲忻然都轉公六十懸弧之辰其德配陳夫人亦於是日同舉壽觴海內外賓朋製錦獻壽禮也但祝壽之文多諛辭茲謹舉都轉立心行事與仁德昭合無閒者質實言之更舉五經之義蘊揚摧陳之都轉少習儒業以家貧經商海外僑居檳榔嶼有所得即寄以供奉養甘旨書酒誥曰肇牽車牛遠服賈用孝養厥

父母都轉有焉嘗迎養斐如榮祿公於檳城藉親色笑旣而榮祿公思歸又奉板輿回里然以遠離膝下居恆鬱鬱不樂迨榮祿公八十有三去世可謂考終令矣而都轉悲感不已星夜奔喪哀毀骨立飾終之禮必誠必信雖歷久而孺慕如一日揆之左傳所稱穎考叔純孝有以異乎都轉母彭太夫人早歲棄養繼母唐太夫人撫都轉甚有恩都轉亦事之彌謹介弟啓泉比部唐出也都轉爲之籌生計完婚嫁圖仕進至周且備詩曰兄弟旣翕和樂且耽孔子引而釋之曰父母其順矣乎都轉之友于篤愛即所以博雙親歡也孝弟乃爲仁之本其天性之仁見於家庭孝友者有如此都轉撥巨欸倡建本邑官學堂戴氏家族學堂又永興之公學堂三河鄉之小學堂靡不助欸首爲提倡次第建立丙午歲饑都轉輸海米數十萬石平糶活人無算又立祭田以祀祖置恆產以贍族此特瑩瑩舉其大者其他修橋梁築道路贈醫藥掩骼埋瘞育嬰養老凡有義舉無不樂輸至於海外孤客故鄉耆宿咸周恤之從無吝色其濟物之仁見於施予解推者有如此都轉之涉外洋也實因咸同間兵亂村

落邱墟不得已子身遠投海濱以圖餬口克勤克儉銖積寸累以至起家然不忘在
莒仍守寒儉故島國商賈驟富者輒盛其車馬衣服峻宇彫牆互相誇耀而都轉獨
崇質樸依然儒素家風曲禮曰富貴而知好禮則不驕不淫又繼之曰百年日期頤
然則都轉克享期頤之壽固由富而好禮所致也其節儉之德見於菲薄自奉者有
如此都轉居海邦數十年家道殷厚人以爲別有操贏勝算不知都轉與人交易而
退不競爭不居奇不兼并惟以不貪爲寶故亦無傾蹟之虞其公正之德見於與人
交處者有如此都轉性廉退淡於仕宦捐賑疊晉頭銜鳳誥頒綸恩周奕代無非爲
顯親計丁未歲駐英李星使以都轉久居南洋羣島爲華僑所信服派充檳榔嶼領
事都轉於外交事不激不隨動中窾要當道甚相倚重而都轉謙抑不遑屏絕夤緣
不求躁進其遜讓之德見於仕宦進退者有如此凡此存心制行豈猶有歉於仁乎
豈猶有虧於德乎宜其躋大耋而爲全福之人矣然攷易家人之象曰男正位乎外
女正位乎內陳夫人之相夫子也逮事都轉之父若母婉順恪恭克盡婦道處姑嫜

妯娒悉無間言而且尊師訓子有封鮐畫狄之風周急扶危有脫簪解驂之誼凡都轉之得以殫力經營於外皆資於夫人內助之力也夫人賢矣方之挽鹿車舉鴻案豈有愧色乎魯頌之詩曰令妻壽母若夫人者足以當之矣然詩之頌夫人者必歸美於子孫衆多今夫人有子四孫三按之三人成衆之訓有過之無不及況長子芷汀太守以名諸生歷縣令而躋郡伯出守泉州入筦財賦次子淑原比部現供職郎曹簪纓方盛光大門閭正未有艾其爲顯揚大矣都轉與夫人方康強逢吉當亦覩萊衣之舞彩而懽然晉一觴也乎

蕭母盧太夫人百歲壽序

嘗聞德者福之基也仁者壽之徵也記有之曰故大德者必得其壽是壽必由積德而致也然則曷言仁者壽蓋仁爲心之德仁者之壽亦推本於德之盛也蕭母盧太夫人年屆百歲耳目聰明康強不衰其壽人所共知其德則人或未之知也試爲縷晰陳之盧太夫人乃蕭春園封翁之配行之孝廉之母也孝廉與其嗣君子明齋尹

嘗館於予家孝廉原籍粵東與余同里知之甚悉故太夫人遭際杙樑之餘避地亂離之日可得而詳焉當丁巳年春夏間髮匪由江而閩維時春園封翁在汀州司鹽筴事不得遽歸而賊氛已逼太夫人遂率子二女四奔避而兒女俱幼稚尙有襁負而行者臨流而爭渡陟山而潛伏幾瀕於危矣而又地經數遷始而避於汀郡之東郭外繼而避於牛鬪頭鄉魚溪倉樓終而避於上杭縣之黃泥龍嘉應州之嵩山松口鎮大塘尾鄉其中瑣尾流離不堪言狀當携男帶女奔走於日暮窮途之際幼女勞憊不能行挾之既不能俱前棄之又不忍恕去太夫人計無復之欲自引決其情急勢危極矣而卒之出險履安豈非冥冥中有主之者哉此太夫人蒙難艱貞其德之強固不回有如此春園封翁起家寒素以鹺務自粵之汀方娶太夫人爲室而館穀不豐食指甚繁量入爲出何有何無中饋所需頗勞籌畫暇時輒操針黹補綻衣家道由是振興銖積寸絫悉賴以維持此太夫人相夫持家其德之賢淑勤勞有如此太夫人生男女七人其六皆自哺乳其時種痘法未甚行悉聽自出出則轉相傳

染兒女年相若一時同患痘症藥鼎熏鑪手自煎爇其有患瘡瘍而濃血淋漓者亦必躬親洗滌獨任其勞鮮媼婢之助迨長成男則課以讀書女則覓其婚配丸熊畫荻不足以槩其勞此太夫人鞠育恩勤其德之慈愛無倦有如此有傭媼之夫向業肩輿中暑暴亡無以爲歛太夫人出資爲之殯埋其他內外姻戚有以緩急告者亦不吝解囊相助此太夫人扶危周急其德之好施樂善有如此嗚呼太夫人之德盛矣美矣周浹彌綸而無閒矣有是德宜其有是福洪範五福以壽爲先太夫人之高壽即太夫人之大德亦即太夫人之全福也今日者孝廉與大嗣君子明先生俱舉於鄉次子濬得優貢生三子國英爲警察署員孝廉之弟謙生五子恭寬信敏惠或登賢書或選優拔貢生或爲礦務監督署技正或爲高等審判廳庭長或爲高等學校畢業生門無白丁森庭階而見頭角一堂簪紱爲太夫人稱觴何其盛也雖然回思太夫人自茹蘖含辛以來夫豈始願所能及此其及此詎非太夫人之德日積太夫人之福亦日增乎迄今寢熾寢昌積厚流光家門之慶正未有艾甲寅十二月初

五日爲太夫人設悅之辰宜乎製錦陳樂子子孫孫繞膝羅拜稱彼兕觥以介眉壽太夫人當亦顧之而忻然色喜也乎

江母林太淑人八十壽序

余聞江杏邨侍御之名久矣昔宰仙遊與莆田接壤未嘗謀面迨後同譙於莆田令郭公家始恨相見之晚也侍御以名翰林居諫垣直言敢諫錚錚有聲讀其奏疏者莫不想望其丰采蓋數十年無此讜論亦無此膽識也毅然抗疏凡數十上卒以觸忤權貴乞養歸里蓋是時林太淑人年已七十矣古之孝者始於事親中於事君終於立身詩序曰南陔子相教以養也白華子之潔白也孝子固以養親爲大然必立身潔白乃爲無忝也設立身不潔白則以宦養爲孝不若家食之孝養爲愈矣侍御直臣也亦孝子也事君不得其職豈肯以不潔白之身戀於區區祿養貽吾親羞乎故當日決意解組歸田不但爲潔白其身計亦爲孝養其親計也夫仕宦不論顯與晦惟愜乎已之心孝養不論厚與薄惟悅乎親之心己之心誠愜矣即禍患不能奪

其志親之心誠悅矣即菽水亦足以承歡侍御自乞養歸來日侍親側羞甘旨伺顏色其樂融融時而聚親戚以情話則率子孫捧几杖以追隨時而步隴畝以嬉遊則向野老話桑麻而笑樂以視板輿奉養跼踖官衙遠宦栖遲望斷鄉書者其忻戚爲何如也吾知侍御必不以彼易此矣乙卯二月十五日爲太淑人八十設帨之辰賓朋張錦屏以爲壽夫獻壽者多諛詞若太淑人之婦德母教久昭著於戚鄰閭里間固無所用其貢諛惟太淑人壽臻八十求諸古之賢母亦不數見余於晉得一人焉曰韋逞之母宋氏於隋得一人焉曰許善心之母范氏於宋得一人焉曰朱震亨之母戚氏是三人者秉母教成大儒其母年皆八十以上侍御之母今年八十而未有艾也將來由耄耄而耆期頤寢熾寢昌餘慶尙遠當再雍容揄揚以紀侍御之家慶不徒今日獻壽稱觴而已也

劉桂菴太守暨德配王淑人六十雙壽序

余嘗讀劉炯甫徵君岷雲樓集至小宛解勸學芻言而知其所用心肫肫懇懇迪世

而牖民不憚其辭之繁惟恐其旨之晦不禁肅然起敬曰信乎仁義之人其言藹如也旣而桂菴太守挈其二子友勳友正來見二子余泣閩縣以試所得士也晤語之頃始知太守即徵君之文孫恨余生也晚未與而祖接幸得見明德後之達人快何如也自是過從日密太守之行誼亦日悉今秋八月二十六日爲太守暨其繼配王淑人六秩雙慶二子欲壽其親來請序於余余敬諾迺爲之辭曰自豳風有春酒介壽之文則周初已行之但古者隨時皆可起而爲壽不必限於誕日也唐穆宗誕日羣臣欲舉賀禮宰相韋綬抗言於朝謂古無賀誕之禮事宜寢穆宗從之又唐文皇引生我劬勞之語則以誕日祝壽自唐以來已然矣余師陳蘭甫先生嘗推其故謂當時蓋由人之紀年以誕日爲增一歲故於是日行此禮亶其然乎人子以父母之年爲可喜故於是日爲酒食召親朋以燕樂之此乃愛親敬親之至情也友勳友正其有錫類不匱之思乎余聞自徵君以孝友聞子若孫皆能守其家法太守自幼食貧嘗橐筆爲幕賓以供菽水迨舉於鄉出仕山左令嘉祥汶上縣調補掖縣又權文

登縣所至有聲惟再涖嘉祥縣民悅之猶解倒懸其善政之入人深矣太守淡於宦情目覩時局日非屢上書引退不得所請迨武昌舉事各省響應而山左尙宴然太守獨決計挂冠歸里所謂見機而作不俟終日非歟太守言論鋒發丰采異衆目奕奕有紫光而胸懷坦白韓昌黎稱雀羣曰考之言行而無瑕尤窺之閭奧而不見畛域斯言也太守有焉蓋自徵君履仁義負聲譽君子之澤流於奕世太守胚胎前光目濡耳染學有淵源明德後之達人其在斯乎其在斯乎太守今優遊林下繼先志築遽園栽樹蒔花以娛暮景介弟蓮舫爲鹽權尹顯於時而太守獨闇然而不章蓋其性靜而壽有由然也禮曰人生而靜天之性也感於物而動性之欲也孔子曰智者動仁者靜智者樂仁者壽然則仁者之壽必本於天性之靜也又況太守好施與故舊之貧乏者不吝傾囊資之此亦仁壽之徵也太守繼配王淑人性明婉治家勤儉通詞翰著有春暉閣詩文集四卷周南之詩曰君子好逑魯頌之詩曰令妻壽母淑人於太守爲好逑爲令妻於友勳友正爲壽母今舉行雙慶錦屏孔張瓊筵肆設

子婦拜前孫曾拜後太守與淑人顧而樂之當亦忻然晉一觴以盡家慶之懽乎異日者每十年而一介壽由古稀耄耄以至期頤慶之祝之一門之內雍雍熙熙其樂正未有艾即以此文爲隍引可乎

董母江太恭人六十壽序

嘗讀春秋公羊傳曰母以子貴此言子乃已出也然有子非已出而母亦貴者則其母之賢非尋常可比也攷衛莊姜美而無子以戴嬀之子完爲已子莊姜愛戴嬀甚此燕燕于飛之詩所由作也古人往矣今人豈不古若哉江太恭人者董小谷資政公之笏室也其嫡爲鄭太夫人與太恭人歡愛之情有如姊妹擬諸莊姜之與戴嬀誰謂古今人不相及哉太夫人有子二長昌永舉孝廉而早沒次昌昭隨資政公來閩經商太恭人即資政公在閩時所娶者也年十八來歸生一女無子是以視太夫人之子如已子其時昌昭甫八齡賴太恭人撫養成立及娶妻誕育子女亦賴太恭人體太夫人意曲加調護家庭無間言由是資政公益賢之嘗謂昌昭曰太恭人猶

汝母也汝母在里督理家事不能隨我在外侍我側者惟太恭人凡我飲食起居無不先意承志即撫汝及子女之恩亦宜誌之勿忘昌昭恪遵父命特爲太恭人請封典膺四品之誥服六珈之榮所以報也初歲在光緒戊戌資政公抱恙幾瀕於危起臥扶掖胥太恭人是賴凡中裙廁踰身自澣滌不以爲穢迨病愈昌昭遵太恭人命奉資政公板輿回里未幾舊病復發旋即不起太恭人痛不欲生經子婦再三勸慰方勉起以襄大事然因是哀毀號泣形容已憔悴不堪矣幸而太夫人健在事有稟承相與諮商懽如也世之嫡庶不和有如參商者何限而太夫人之與太恭人獨輯睦歡愛耦俱無猜不可以風世乎孔子刪詩首重二南蓋以有關睢然後有樛木有鵲巢然後有小星庶之安嫡之寵也太夫人賢矣然非太恭人之賢有以得太夫人歡心亦安能相得益彰舉家中出納盈虛事無大小悉以委之而不嫌其權之下替乎迄於今太夫人已沒四年矣而太恭人思慕不衰奉太夫人暨資政公遺像懸諸堂中晨夕供奉可不謂事死如事生乎太恭人自奉甚薄而待僕隸輩甚寬隣里戚

鄰中有貧乏告貸者輒周恤之無吝色此仁者壽之徵也本年十月十八日爲太恭人六十誕辰昭昌爲之製錦獻壽稽之於古以繼子顯著如宋謝宏微之母是也若以嫡子顯者古所罕有然以情而論旣受其恩宜酬其報況資政公曾諭昌昭以勿忘太恭人之恩則行獻壽之儀正所以遵嚴親之訓也夫和氣治而芝菌生人倫明而風俗厚昌昭此舉不特可以勵風俗將見和氣翔洽芝菌叢生今昌昭方在壯年已有十子二女其瓜瓞綿綿正未有艾也今率其子姪孫曾羅拜於階墀之下稱彼兕觥以介眉壽太恭人應亦忻然色喜而爲之晉一觴也乎

洪母謝太夫人五十壽序

余曩歲館於商船總公會與洪君雁賓有賓主之誼知其家世甚悉可得而縷陳焉謝太夫人者九穗中憲公之繼室雁賓之繼母雁陂之生母也攷古之事繼母以孝聞者如周之閔子騫漢之薛包晉之王祥其最著也繼母於前妻之子恩義或有未至而繼子能竭誠盡孝卒得繼母之懽心者尤爲人所難能故史冊特著之以爲孝

子之楷則也若太夫人之於雁賓其恩義可謂周且摯矣太夫人之于歸中憲公也雁賓之生母陳太夫人甫謝世雁賓猶在襁褓自乳哺以至孩提凡鞠我拊我蓄我長我育我顧我腹我者皆太夫人之力也與屬毛離裏何以異哉故雁賓之德太夫人嘗思報以昊天罔極之恩非區區以獻壽稱觴爲盡子職也然父母之年不可不知丁巳十二月二十五日爲太夫人五十壽誕雁賓喜其年臻大衍而爲之徵詩製錦以伸愛敬之忱禮也夫禮必本乎人情孝子以父母之年爲可喜爲之具酒食召親朋以燕樂之豈非人子愛親敬親之至情乎余嘗攷朱子跋蔡端明獻壽儀云蔡忠惠公此帖今始得見於其來孫誼之家乃知昔之君子所以事其親者如此其愛旦敬也孤露餘生無所爲孝捧玩鳴咽不能仰視遂請摹而刻之以視世之爲人子者庶以廣蔡公永錫爾類之志觀於朱子此言則知有老親者行獻壽之禮正所以遵朱子之教也初庚寅秋太夫人之來歸也年二十二及辛亥夏中憲公之去世也年四十四結褵二十二年其相夫經營產業計有無司出納始而經商淮揚繼而經

商閩嶠其中貿遷操贏家道振起無內顧憂者實賴太夫人贊成之二十二年如一日也其訓子課女管教媳婦諸孫指揮奴僕侍婢經紀家政閫以內肅然實賴太夫人訓誡之二十二年如一日也其拯困扶危周恤戚鄰修築道路捐助學堂舉凡慈善之舉靡不樂從實賴太夫人惠濟之二十二年如一日也吁賢矣然此猶未足以盡其賢其最足稱者太夫人之初歸中憲公之生母駱太夫人猶在太夫人善事邁姑克盡婦道日竭甘旨極意承歡飲食必躬親獻進起居必躬親扶掖誠心至愛出自天真擬諸唐夫人之事其姑長孫夫人無以異也迨丁未之秋駱太夫人棄養太夫人之盡孝事姑凡十八年可謂無倦勤矣中憲公捐館在閩適太夫人在鎮海不得親視含斂聞凶耗至痛不欲生日夜號泣幾至喪明經子媳輩再三勸慰始忍痛扶疾勉起以經營喪葬迨窆窆已安而太夫人已困憊不堪矣幸而體素強健雖歷諸艱而精神不衰嘗立雁賓雁鰥而訓之曰汝父年十五而孤仰承先業家本小康因遭髮匪之亂遂至中落自幼操計然術經營數十年甫稍獲餘積以遺子孫然當